

nos 65. Credo autem ad perfectionem hujus cellae pertinere, quod inter Anniversaria legitur Joannem de Hoya, Gandensem, sacrae theologiae professorem, dotasse cellam unam. Obiit annos natus octoginta septem anno 1518, die 17 novembris, inhumatus apud Conradum de Sarto.

CAPUT XXXVII.

COMMEMORATIO ALIQUOT CARTHUSIANORUM DOMUS LOVANIENSIS.

Henricus de Duvelandia.

Obiit anno 1479, die 20 januarii apud Antverpiam, convisitator et prior domus S. Catharinae, specialis procurator et promotor hujus novellae plantationis; qui sua sollicitudine privilegia, dominorum consensum et multa bona impetravit.

Joannes Schullinc, primus rector.

Ex priore domus Delphensis constituitur primus rector domus Lovaniensis. Obiit 19 februarii.

Rectorem Carthusiani vocant eum, qui monasterio a capitulo generali aut a Majoris Carthusiae Priore praeficitur; quem plerumque anno evoluti conventus capitulariter eligit, et tum demum Prior ab eis vocatur.

Joannes Delphus, primus prior.

Obiit anno 1550, die 25 maii, postquam usque ad extremam senectutem in hac novella plantatione fidelissime laborasset.

Joannes Vekenstyl, primus procurator.

Vekenstyl, alias Blauwen-Steen, ex nomine domus paternae, patria

Lovaniensis, primus vicarius et procurator, per multos annos Deo et monasterio diligenter servivit. Hic annum suum jubilaicum celebravit anno 1503, et quinquaginta tribus annis laudabiliter in Ordine vixit.

Petrus Amstelredamensis.

Cognomento apothecarius, artium magister, omnium primum investitus est 2 octobris anno 1504, et in Dei servitio jubilarius, anno demum 1557 die 10 februarii obdormivit. Ob affabilem de rebus antiquis et variis colloquutionem reverendissimis viris Nicolao Rutherio, episcopo Atrebatensi, Roberto a Bergis, electo Leodiensi, multisque aliis gratissimus fuit.

Theodoricus de Emstede.

Natus in Emstede, viculo prope Harlemum, studiosus juris, anno 1505 ad statum monachi et ad osculum receptus est. Fuit industrius pictor et scriptor, multo tempore vicarius domus et novitiorum instructor, omnibus obsequiosissimus et verus pacis amator; ac tandem quartus prior obiit anno 1542, 5 aprilis. Accessit anno 1529 frater ejus Joannes Simonis de Emstede, artium magister, qui fuit hujus domus procurator.

Cornelius Fekerdey, Amstelredamensis.

Frater Lamberti, prioris Amstelredamensis, anno 1506 ad statum monachi et ad osculum unanimiter est receptus. Qui etiam Franciscum fratrum suum, physicum, ad hunc Ordinem et hanc domum attraxit.

Amelricus de Bruxella.

Sacerdos saecularis in ecclesia S. Jacobi supra Biest serviens, quartus professus hujus domus, admodum humilis et exemplaris in Ordine per annos quadraginta tres vixit.

Joannes de Leodio, donatus.

Hic professionem fecerat in abbatia quadam juxta civitatem Merspurgensem; sed impetrata abbatis licentia ut in Carthusia Lovanii reciperetur, sicut literae declarant, quas apportavit, ad statum donati benigne et caritative receptus fuit. Erat bonus calcearius, laboriosus operarius et laudabilis conversationis.

Robertus de Monte.

Fuit collega Joannis donati in professione, cocus domus, admodum singularis donatus, qui annis quadraginta fideliter servivit.

Theodoricus Persyn, de Amstelredamis.

Artium magister, receptus est ad statum monachi et ad osculum anno 1509. Anno vero 1525, quum Joannes Petri, Delphus, primus prior, ob senectutem instantissime absolutionem sollicitaret, electus est in secundum priorem domus. Obiit autem peste anno 1552, 21 octobris, Delphis, quo loco fratrem habuerat monachum et sacerdotem, et patrum in utroque jure doctorem, priorem domus Delphensis et convisitatorem provinciae.

Adrianus Boot, Brugensis.

Artium magister Parisiensis, paucis annis in Ordine expletis, plenus bonis operibus in Domino obdormivit anno 1514, 19 aprilis. Claruit etiam Lovanii, ad Martinenses, frater Ambrosius Boot, Bruxellensis presbyter, cujus parentes inter alia dederunt pretiosam fenestram vitream de duodecim sibyllis.

Gerardus Harlemius.

Artium magister, anno 1512 fratribus praepositus ad statum monachi

et ad osculum receptus est. Hic, toto tempore quo fuit in Ordine, virili ac viva voce nunquam somnolentus in divinis laudibus laboravit.

Franciscus Edamensis.

Scholarum magister ac virilis magnitudinis, propter quod a fratribus appellatus est Goliath. Receptus est anno 1515. Fuit sacrista, postea procurator, deinde propter singularem gratiam praedicator et vicarius domus monialium divae Annae prope Brugas, et postremo tertius hujus domus prior. Obiit anno 1559, 2 decembris.

Joannes de Thimo.

Artium magister, filius Gerardi de Thimo, secretarii oppidi Lovaniensis, magni benefactoris domus, receptus est ad statum monachi et ad osculum anno 1510. Obiit procurator domus 5 februarii. Hic descripsit sua manu librum, qui inter alia continet acta domus sub primo priore Joanne Delpho, et vocatur a domesticis *Liber Thimo*. Unde superiora fere desumptissimus.

Joannes Roboschius.

Patria Mechliniensis, hujus domus professor. Obiit prior in domo Bruggensi anno 1560, die 15 januarii. *Anniversaria.*

Florentius Harlemius.

(*Desideratur notitia in Molani codice.*)

Michaël Moons, Mechliniensis.

Professor anno 1553, obiit prior domus Delphensis anno 1555, 29 junii.

Joannes Surpel, Lovaniensis.

Professor domus Lovaniensis ac ejusdem domus prior, postea autem

ex mandato capituli prior Leodiensis. Obiit Lovanii anno 1582, 8 februarii, laesus ex ruina currus cum vase onusti.

Henricus de Leodio.

Prior Diestensis et convisitator provinciae. Cum suo conventu Lovanii profugus, ibidem hospes obiit 25 julii, anno 1472.

Petrus de Myrica, Lovaniensis.

Leodium ad visitatorem profectus, defunctus est anno 1579, die 29 septembris.

Mauritius Chanceus, Anglus.

Prior domus de Schene, cum toto suo conventu Lovanii exulans, a Catholica Majestate rediens moritur Parisiis anno 1581, die 12 julii. Scripsit *Carthusianorum Londinensium martyrium.*

CAPUT XXXVIII.

MEMORABILIA QUAEDAM APUD CARTHUSIANOS.

Ex repertorio Statutorum.

« Abstinencia non fit ultra semel in septimana; sicut a vino, sic a cer-visia est abstinendum. Caseis aut ovis non utimur.

Amplexus et oscula non laudamus, neque ludos manuales.

Arengas vel prooemium non faciant in literis suis, scribentes capitulo generali vel Priori Carthusiae.

Auricularia universa ab Ordine removeantur.

Barbam non decurtent conversi, nec rasoriis grenones radant.